

**TEZAUUR LITURGIC**  
**26 NOIEMBRIE**

**ACATISTUL**  
**SF. CUVIOS**  
**STELIAN**  
**DIN**  
**PAFLAGONIA**  
**I**



**MOSCOVA, 2000**



# Акафист

## святому преподобному

## Стилиану Пафлагонскому

---

### Кондак 1

Избранный чудотворче и угодниче Христов, скорый помощниче и молитвенниче наш, преподобне отче Стилиане, прославляя прославльшаго тя Господа, похвальная пения приносим ти, чтущии святую память твою. Ты же, предстоя пред Престолом Вседержителя, воздвигни о нас, грешных, многомощныя молитвы твоя, взывающих ти: Радуйся, преподобне отче Стилиане, преславный чудотворче.

### Икос 1

Ангелов Творец и всея твари Создатель еще от утробы матерния избра тя, преподобне Стилиане, чудным житием своим на земли прославляти Троицу Святую, по блаженней же кончине твоей учини тя со святыми Ангелы воспевати Ему песнь сладчайшую на небеси. Мы

же, таковому Бóжию благоволенію о тебе радуясь, песнословим тя:

Ра́дуйся, Святы́я Цѣркви похвало́.

Ра́дуйся, Пафлагоніи крѣпкій сто́лпе.

Ра́дуйся, добра́го воспитанія цвѣте благоуханный.

Ра́дуйся, Божѣственнаго избра́нія сосуде благословѣнный.

Ра́дуйся, Го́спода от юности возлюбивый.

Ра́дуйся, ве́ру и любовь в се́рдце своем возрастивый.

Ра́дуйся, целомудрие души своея́ сохранивый.

Ра́дуйся, смире́ние великое стяжавый.

Ра́дуйся, пусты́ни великий моли́твенниче.

Ра́дуйся, благода́тный иноков путевождю́ и наставниче.

Ра́дуйся, о́тче Стили́ане, пресла́вный чудотворче.

## **Конда́к 2**

Ви́дя чистоту́ се́рдца твоего́, о́тче Стили́ане, Всеви́дец Го́сподь испо́лни ду́шу твою́ благода́ти Своея́ и освяти́ ю́ в сосуд Ду́ха Свята́го, да

видящи тя восхвалят Бога Вседержителя и, взявши на рамо кийждо крест свой, во след Ему грядет, воспевая: Аллилуиа.

## Икос 2

Разумом, просвещенным от Господа, исполнен быв, преподобне, не попустил еси страstem в души твоей воцариться, силою Божиею вся хитрости тленнаго и временнаго жития отражая. Темже, усердие твое похваляюще, вопием ти:

Радуйся, земли Пафлагонския похвало.

Радуйся, Церкви Христовы зеркало.

Радуйся, на земли, яко на небеси поживый.

Радуйся, невозвратно за Господом последовавый.

Радуйся, молитвы, поста и воздержания хранителю.

Радуйся, истиннаго богопочитания насадителю.

Радуйся, смирением мир души своея стяжавый.

Радуйся, тленная и временная мира сего презревый.

Ра́дуйся, от Го́спода да́р чудотворе́ния  
получи́вый.

Ра́дуйся, врага́ злоко́зненнаго низложи́вый.

Ра́дуйся, о́тче Стили́ане, пресла́вный  
чудотво́рче.

### **Конда́к 3**

Си́лою Божество́вныя любве́, ёю́же испо́лнено  
бы́сть се́рдце твоё, укрепля́емый, свя́те  
Стили́ане, вся́ имени́я твоя́ ни́щей бра́тии  
разда́л еси́ и, ко бра́тии ино́ческой  
сопричте́нный, сла́дце воспева́л еси́ Бо́гу:  
Аллилу́иа.

### **И́кос 3**

Име́я в се́рдце своёмъ жела́ние ве́лие к  
непреста́нному восхожде́нию ле́ствицею  
духо́вною и уедине́ние возлюбивъ, бра́тию свою́  
оста́вил еси́, подви́жниче многотру́дный, и в  
пеще́ру пресели́вся, дни́ и но́щи в славосло́вии  
Бо́га пребыва́л еси́. Таковому́ твоему́  
дерзнове́нию дивя́щися, восхваля́ем тя:

Ра́дуйся, Го́спода все́м се́рдцем возлюбивый.

Ра́дуйся, Ца́рствия Небе́снаго взыска́вый.

Ра́дуйся, му́дре ко спасе́нию стопы́ своя́  
направи́вый.

Ра́дуйся, Бо́га добродéтельным жити́ем  
просла́вивый.

Ра́дуйся, вели́ких дарова́ний вместѣлище.

Ра́дуйся, трезвѣния и воздержáния  
храни́лище.

Ра́дуйся, я́ко жити́ю безплóтных поревновáл  
еси́.

Ра́дуйся, я́ко пóдвигом дрéвних отцѣв  
пустынножителѣй подража́л еси́.

Ра́дуйся, Божéственною благода́тию сердца́  
моля́щихся тебѣ напая́й.

Ра́дуйся, благода́тныя исцелѣ́ния дѣтем  
ма́лым источáй.

Ра́дуйся, о́тче Стилиáне, пресла́вный  
чудотво́рче.

#### **Конда́к 4**

Бу́рю по́мыслов и страсте́й безбе́дно претерпе́л  
еси́, о́тче преподо́бне, и приста́нище тѣхое  
Христа́ обре́л еси́, Емúже во мно́зе  
долготерпѣ́нии нелѣ́нотно рабо́тая воспева́л еси́:  
Аллилу́иа.

## И́кос 4

Слы́шавше о богоу́годнем жити́и твоём, о́тче Стили́ане, мно́гия стра́ждущия и немощны́я к пеще́ре твое́й прихо́ждаху и, наста́влением твои́м внима́я, в и́стинней ве́ре укрепля́хуся, в печа́лех утеше́ние обрета́ху и во гресе́х слёзное пока́яние прино́шаху. Сего́ ра́ди ублажа́ем тя:

Ра́дуйся, свети́льниче присногоря́щий, пу́ть спасе́ния освеща́яй.

Ра́дуйся, крине́ пусты́нный, свя́тостью благоуха́яй.

Ра́дуйся, ра́бе Госпо́день, благо́й и ве́рный.

Ра́дуйся, небе́сными дарова́нии обогащённый.

Ра́дуйся, я́ко пред Престо́лом Царя́ Небе́снаго предсто́иши.

Ра́дуйся, я́ко Бо́гу моли́твы о нас прино́сиши.

Ра́дуйся, Го́спода кро́ткий и смире́нный служи́телю.

Ра́дуйся, за́поведей Бо́жих ре́вностный исполните́лю.

Ра́дуйся, я́ко милосе́рдие Отца́ Небе́снаго к нам приклоня́еши.

Ра́дуйся, я́ко лю́бовию к Бо́гу сердца́ на́ша  
исполня́еши.

Ра́дуйся, о́тче Стили́ане, пресла́вный  
чудотво́рче.

### **Конда́к 5**

Боготéчной звездé уподо́бился еси́, преподо́бне  
о́тче, свéтом благочестива́го жити́я твоего́  
пусты́ню освяща́я и вся́ приходя́щия к тебе́  
учéнием Христо́вым просвеща́я и ве́ровати во  
Еди́наго и́стиннаго Бо́га навча́я, да кúпно с  
тобо́ю воспева́ют: Аллилу́иа.

### **И́кос 5**

Ви́девше, я́ко ча́да ма́лыя незло́биви сúть, и  
словесéм Ева́нгельским внима́я: «Ами́нь глаго́лю  
ва́м, а́ще не обратит́ся и бу́дете я́ко де́ти, не  
вни́дете в Ца́рство Небе́сное», ве́ру тако́ую  
стяжа́л еси́, преподо́бне о́тче, и благода́ть от  
Го́спода моли́тися о ча́дах восприя́л еси́. Мы́ же,  
воспева́я вели́чия Бо́жия, на тебе́ явлéнная,  
глаго́лем ти́ си́це:

Ра́дуйся, младе́нцев бла́гостный попечи́телю.

Ра́дуйся, ма́терей боле́знующих о ча́дах сво́их  
уте́шителю.

Ра́дуйся, возложе́нием ру́к немо́щи младе́нцев  
исцеля́вый.

Ра́дуйся, ве́ру чи́стую и и́скреннюю в себѣ  
стяжа́вый.

Ра́дуйся, я́ко ча́дом ма́лым  
покрови́тельствуеши.

Ра́дуйся, я́ко за безча́дных роди́телей о  
дарова́нии им ча́д Бо́га умоля́еши.

Ра́дуйся, душе́вныя и теле́сныя недуги  
исцеля́й.

Ра́дуйся, ко благо́честивому жити́ю  
побужда́й.

Ра́дуйся, те́плый на́ш моли́твенниче.

Ра́дуйся, ми́лостивый на́ш засту́пниче.

Ра́дуйся, о́тче Стили́ане, пресла́вный  
чудотво́рче.

### **Конда́к 6**

Пропове́дником ева́нгельския крото́сти бы́л еси́,  
преподо́бне о́тче, о́бразом жити́я твоего́ все́м  
показу́я, я́ко вся́ возмо́жна челове́ку о  
укрепля́ющем Бо́зе, Его́же благода́тию и на́ша  
сердца́ во и́стинней ве́ре укрепи́ и бу́ди на́м

скóрый помóщник и тéплый моли́твенник,  
вопи́ющим о тебе́ Бо́гу: Аллилу́иа.

### И́кос 6

Возсия́ еси́ я́ко свети́льник, на све́щнице  
церко́вней поста́вленный, свя́те Стили́ане, да  
вси́ ви́дящи мно́гая чудеса́ исцелéний тобо́ю  
твори́мая и при́сно явля́емая, восхва́лят Бо́га,  
ди́внаго во святы́х Свои́х, тебе́ же воспою́т  
сицева́я:

Ра́дуйся, равноа́нгельный слуго́ Госпо́день.

Ра́дуйся, обита́лище Ду́ха Свята́го.

Ра́дуйся, благоче́стием себе́ украси́вый.

Ра́дуйся, в сосу́д благоуха́нный ду́шу твою́  
обрати́вый.

Ра́дуйся, я́ко на земли́ и́мя твоё  
прославля́ется.

Ра́дуйся, я́ко сла́достью небе́сною  
наслажда́ешься.

Ра́дуйся, жа́жду духо́вную утоли́вый.

Ра́дуйся, на небесе́х обита́ль себе́ сотвори́вый.

Ра́дуйся, я́ко со А́нгелы Го́спода воспева́еши.

Ра́дуйся, я́ко в лице́ преподо́бных  
пребыва́еши.

Ра́дуйся, о́тче Стилиа́не, пресла́вный  
чудоотво́рче.

### **Конда́к 7**

Хотя́ яви́ти ми́ру но́ваго исто́чника ми́лости  
Своея́ неоскудева́ющая, Христе́ Бо́же наш,  
дарова́л еси́ нам предста́теля и моли́твенника к  
Тебе́ дерзнове́ннаго – преподо́бнаго Стилиа́на, да  
Тя́, Всеблага́го Бо́га нашего́ сла́вяще, во  
умиле́нии серде́чном зове́м: Аллилу́иа.

### **И́кос 7**

Но́ваго ходата́я и засту́пника и́мамы ты́ пред  
Бо́гом, блаже́нне Стилиа́не, ты́ бо душе́ю  
кро́ткою и ми́лостивою непреста́нно мо́лиши  
Го́сподеви, о́ еже ниспосла́ти благода́тную  
по́мощь все́м лю́дем, сла́вящим Его́, Всеблага́го  
Отца́ нашего́ Небе́снаго, и вопи́ющим ти́ си́це:

Ра́дуйся, арома́ты райскими́ благоуха́яй.

Ра́дуйся, неисчерпа́емый исто́чнице  
исцеле́ний.

Ра́дуйся, усерд́ный о́ нас моли́твенниче.

Ра́дуйся, оби́димых кре́пкий засту́пниче.

Ра́дуйся, добродете́льнаго жити́я учи́телю.

Ра́дуйся, немощны́х иску́сный целите́лю.

Ра́дуйся, в любви́ к Бо́гу пламенёвый.

Ра́дуйся, небёсных бла́г возжелёвый.

Ра́дуйся, праведности́ нас научая́й.

Ра́дуйся, люби́ти Бо́га и бли́жняго своего́ нас наставля́й.

Ра́дуйся, о́тче Стили́ане, пресла́вный чудотво́рче.

### **Конда́к 8**

Стра́нника и пришельца́ помышля́л еси́ себе́ бы́ти в ми́ре се́м, преблаже́нне о́тче, оте́чества горня́го взыску́я и Небе́снаго Иерусали́ма гражда́нином бы́ти желая́, в нёмже ны́не сла́дце воспева́еши Бо́гу пе́снь: Аллилу́иа.

### **И́кос 8**

Ве́сь распали́лся еси́ любви́ю к Сладча́йшему Иису́су, преподо́бне о́тче, дни́ и но́щи в моли́тве и по́двигах пребыва́я и, Ду́ха Свята́го испо́лнися, все́му ми́ру моли́твенник изря́ден показáлся еси́, ре́ки чуде́с источа́яй. Сего́ ра́ди, почита́я святу́ю па́мять твою́, во умиле́нии зове́м:

Ра́дуйся, на по́мощь тя́ призыва́ющих спаса́яй.

Ра́дуйся, недúжных и стра́ждущих исцеля́яй.

Ра́дуйся, вра́жиих стрéл прогонíteлю.

Ра́дуйся, диа́вольских наве́тов разорíteлю.

Ра́дуйся, я́ко А́нгелы́ труды́ тво́ими  
возвесели́л еси́.

Ра́дуйся, я́ко диа́вола по́двигами́ тво́ими  
посрамил еси́.

Ра́дуйся, непоколебимый сто́лпе  
иночествующих.

Ра́дуйся, милостивый покровíteлю в  
супру́жестве живу́щих.

Ра́дуйся, присный о нас к Бо́гу моли́твенниче.

Ра́дуйся, в беда́х ско́рый наш засту́пниче.

Ра́дуйся, о́тче Стили́ане, пресла́вный  
чудотво́рче.

### **Конда́к 9**

Вся́кое естество́ удиви́л еси́, предивне о́тче,  
еди́наго бо Бо́га возлюбив, в пусты́ни взыска́л  
еси́ Того́ равноа́нгельным жити́ем тво́им, ны́не  
же на небесе́х блаже́нства райскаго  
наслажда́ешься и воспева́еши Пресвяте́й  
Тро́ице: Аллилу́иа.

## И́кос 9

Ветія́ многовещáнные не мѡгут по достоя́нию воспѣти вся́ пѡдвиги и труды́ твоя́, преподѡбне ѡтче, во сла́ву Го́спода тобо́ю творимы́я. Мы́ же, душа́ми умиля́ясь, богоугодное жити́е твоѣ́ восхваля́ем пѣнии таковы́ми:

Ра́дуйся, и́стинному служѣ́нию Бо́гу нас науча́яй.

Ра́дуйся, сердца́ наша́ радости исполня́яй.

Ра́дуйся, я́ко безро́потному несѣ́нию креста́ нас науча́еши.

Ра́дуйся, я́ко неду́ги наша́ душе́вные и телѣ́сныя исцеля́еши.

Ра́дуйся, благочѣ́стия вода́ми жа́ждущия спасѣ́ния напои́вый.

Ра́дуйся, свѣ́том Богопозна́ния ве́рныя просвети́вый.

Ра́дуйся, во бранѣ́х со страстьми́ помѡщниче.

Ра́дуйся, младенцев от неду́гов защи́тниче.

Ра́дуйся, лампа́до любве́ неугаси́мая.

Ра́дуйся, ле́стнице на небеса́ возводя́щая.

Ра́дуйся, ѡтче Стили́ане, пресла́вный чудотво́рче.

## Кондак 10

Спасти́ся хотя́щи от разли́чных напа́стей, бе́д и скорбе́й, тебе́, преподо́бне о́тче, предста́теля кре́пкаго и поборо́ника непосты́днаго име́ют: прия́л бо еси́ от Бо́га благода́ть во вся́ких беда́х заступа́ти призыва́ющия на по́мощь и́мя твоё, да моли́твами твои́ми огражда́еми, благода́рно воспева́ем о тебе́ Спаси́телю на́шему: Аллилу́иа.

## И́кос 10

Стена́ твёрдая и огражде́ние кре́пкое яви́лся еси́ ми́ру, преподо́бне о́тче Стили́ане, ходата́йством бо твои́м Це́рковь Свята́я укрепля́ется, ми́р водворя́ется и вся́ во бла́го устраи́вается. Сего́ ра́ди приими́ от нас сицевая́:

Ра́дуйся, от па́губных ересей отвраща́яй.

Ра́дуйся, о́чи на́ша душе́вныя просвеща́яй.

Ра́дуйся, я́ко благода́тию Бо́жиею сердца́ на́ша укрепля́еши.

Ра́дуйся, я́ко о прощё́нии грехо́в на́ших Го́спода умоля́еши.

Ра́дуйся, спасе́нию ду́ш на́ших пособству́яй.

Ра́дуйся, на пу́ть пра́ведный нас направля́яй.

Ра́дуйся, от ко́зней вра́жиих защи́тнице.

Ра́дуйся, на Стра́шнем Суде́ засту́пниче.

Ра́дуйся, щедро́т Бо́жиих ми́лостивый  
пода́телю.

Ра́дуйся, у Престо́ла Вседержи́теля  
предста́телю.

Ра́дуйся, о́тче Стили́ане, пресла́вный  
чудотво́рче.

### **Конда́к 11**

Пе́снь хвале́бную прино́сим ти́, преблаже́нне  
о́тче, почита́ющей святу́ю па́мь твою́, ты́ же  
усе́рдно моли́ Святу́ю Трои́цу о́ еже изба́виться  
на́м от паде́ний грехо́вных и жи́знь ве́чную  
насле́довати, да непреста́нно зове́м Бо́гу:  
Аллилу́иа.

### **И́кос 11**

Светоза́рный свети́льник, от И́стиннаго Све́та  
озаря́емый, су́щим на землі́ явля́еши,  
преподо́бне о́тче Стили́ане, сердца́ бо ве́рных  
просвеща́еши и к ра́зуму Боже́ственному вся́  
наставля́еши, да со умиле́нием зову́т ти́ сицева́я:

Ра́дуйся, на землі́ я́ко А́нгел пожи́вый.

Ра́дуйся, на небеси́ со святы́ми пребыва́яй.

Ра́дуйся, Го́споду жити́ем своим угоді́вый.

Ра́дуйся, послéдователем стопа́м Его́ себе́ показáвший.

Ра́дуйся, я́ко вене́ц безсме́ртня от Бо́га прия́л еси́.

Ра́дуйся, я́ко райское блаже́нство со святы́ми унасле́довал еси́.

Ра́дуйся, во бде́нии пребыва́ти нас наставля́яй.

Ра́дуйся, моли́твенно нас покрыва́яй.

Ра́дуйся, в тяжких обстоя́ниях наш помо́щниче.

Ра́дуйся, си́рых и немощны́х засту́пниче.

Ра́дуйся, о́тче Стили́ане, пресла́вный чудотво́рче.

### **Конда́к 12**

Благода́ть да́нную ти́ от Го́спода ве́мы, преподо́бне о́тче, во е́же не то́кмо недужны́я младе́нцы исцеля́ти и засту́пником и покрови́телем им бы́ти, оба́че и все́му христиа́нскому ро́ду ми́лости своя́ низпосыла́ти; ве́руем, я́ко и по сме́рти вся́ сия́ твори́ши все́м, с ве́рою к чудотво́рным ико́нам твои́м припада́ющим, Бо́гу же о тебе́ вопию́щим: Аллилу́иа.

## И́кос 12

Пою́ще сла́вное жити́е твоё́ и о блаже́нном  
отше́ствии твоём на небеса́ раду́ющесея,  
пречу́дне о́тче Стили́ане, ублажа́ем тя́, я́ко  
уго́дника Бо́жия и дивна́го чудотво́рца. Ты́ же,  
Бо́гу предсто́я, при́сно помина́й на́с,  
соверша́ющих любо́вию па́мять твою́ и со  
умиле́нием зову́щих ти́ такова́я:

Ра́дуйся, жити́е твоё́ благоче́стиво сконча́вший.

Ра́дуйся, в ра́дость Го́спода твоего́ вше́дый.

Ра́дуйся, Го́рняго Иерусали́ма честне́йший  
граждани́не.

Ра́дуйся, райских оби́телей досто́йный  
обита́телю.

Ра́дуйся, чту́щих тя́ благода́тный наста́вниче.

Ра́дуйся, притека́ющих к тебе́ бла́гостный  
покрови́телю.

Ра́дуйся, младе́нцев цели́телю.

Ра́дуйся, ю́ных наста́вниче.

Ра́дуйся, все́х призыва́ющих тя́ ми́луй и  
пита́й.

Ра́дуйся, и по кончи́не твоё́й исцелё́ния  
оби́льно источа́й.

Ра́дуйся, о́тче Стили́ане, пресла́вный  
чудоотво́рче.

### **Конда́к 13**

Овсехва́льный и предивный уто́днице Христо́в,  
преподо́бне о́тче Стили́ане! Приими́ си́е ма́лое  
моле́ние, от усер́дия на́шего в похвалу́ тебе́  
приноси́мое, и покрый моли́твами твои́ми все́х  
притека́ющих к тебе́ с ве́рою и любо́вию, да  
покая́ние на́ше прии́мше, Госпо́дь и Бо́г на́ш  
простит на́м вся́ грехи́ на́ша и соприча́стники  
Ца́рствия Своего́ соде́лает, да вы́ну с тобо́ю и со  
все́ми святы́ми воспева́ем Ему́: Аллилу́иа.

Этот конда́к чита́ется трижды, затем и́кос 1-  
й и конда́к 1-й.

### **Моли́тва**

Освяще́нная главо́, преподо́бне о́тче Стили́ане!  
По́двигом до́брым подвиза́вся на земли́, на  
небесе́х восприя́л еси́ вене́ц пра́вды от Христа́  
Бо́га на́шего. Те́мже на тво́й святы́й о́браз  
взира́юще, о пресла́внем сконча́нии жи́тельства  
твоего́ ра́дуемся и чтим святу́ю па́мять твою́.  
Почита́юще же твоё ве́лие дерзнове́ние пред  
Го́сподем, со смире́нием мо́лим тя́, преподо́бне  
о́тче: воззри́ убо́ благосе́рдным о́ком любве́ твоея́  
на на́с, недостойных рабо́в твои́х, и потщи́ся

богоприятным твоим ходатайством испросити у Царя царствующих и Господа господствующих, да пробавит великия и богатыя милости Своя на нас, грешных, да подаст нам дух правыя веры, дух любве, мира и радости о Дусе Святе, да избавит ны от всяких бед и напастей, да ниспослет вся полезная ко спасению душ наших. Ей, святче Божий, не посрами упования нашего, еже на тя по Бозе и Богородице возлагаем, но буди нам помощник и покровитель во спасение, да сподобимся скончати житие наше в покаянии и восприимем вечная благая во Царствии Христа Бога нашего, и прославим человеколюбие Отца и Сына и Святаго Духа, и твое святое заступление, ныне и присно и во веки веков. Аминь.



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

†

НОВОЕ  
\* НЕБО